



Betulkah Dār al-Islām Pemberontak?

Abdul Rahman Ilyas Kuala Kangsar Perak, bertanya:

Selalu orang mengatakan tentera Dār al-Islām sebagai penjahat – suka buat kacau hendak menegakkan negara Islam seluruh Indonesia yang memeluk berbagai-bagi agama. Adakah kita boleh memaksa seseorang memeluk agama? Pertanyaan yang akhir ini saya datangkan kerana heboh orang mengatakan bahawa tentera Dār al-Islām menawan orang yang beragama lalu memaksa mereka memeluk agama Islam.

Jawab: yang mengatakan tentera Dār al-Islām sebagai penjahat itu ialah musuh-musuh mereka. Bahawa yang baik pada pandangan mereka ialah tentera Indonesia yang telah banyak menembak umat Islam sama ada yang berjuang di dalam Dār al-Islām atau pun yang hanya berpolitik Islam.

Apakah kejahanan seseorang tentera Islam yang berjuang menegakkan kalimah Tuhan?

Di Indonesia, yang terbanyak ialah pemeluk-pemeluk yang beragama Islam dan setelah melihat itu maka bagi umat Islam Indonesia diwajibkan menghukum dengan hukum Allah kerana jika mereka tidak menghukum dengan hukum Allah mereka akan jadi kafir, fasiq dan zalim. Sebab itulah mereka diwajibkan berjuang menegakkan kalimah Tuhan, menegakkan negara Islam kerana dengan tegaknya negara Islam itulah sahaja hukum-hukum Allah akan dapat dijalankan.

Soalan-soalan hendaklah jangan berlebih-lebih kerana akan menyulitkan kita untuk menjawabnya. Soalan-soalan agama yang selalu terjadi dalam masyarakat adalah diutamakan dari yang lainnya – bertanyalah!!!

Tentang paksaan kepada orang-orang memeluk agama Islam dengan sifat perjuangan itu tidak boleh disatukan.

Kita yakin tidak ada paksaan yang dilakukan. Ini hanya dakyah semata-mata, dakyah daripada orang-orang Komunis yang diulukan oleh Sukarno untuk memburukkan orang-orang Islam; tetapi kalau kezaliman terhadap orang-orang Islam boleh didengar sendiri terutamanya dalam perjuangan sekarang sehingga ada orang yang digantung kakinya ke atas, diseksa dengan berbagai-bagi seksaan.

Fitnah-fitnah menyatakan paksaan dihadapkan kepada orang-orang yang bukan Islam supaya memeluk agama Islam itu ialah “filem” lama yang dihadapkan oleh musuh-musuh Islam kepada Islam terutamanya di Indonesia kerana dakyah yang keluar dari Indonesia hanya dari sebelah pihak sahaja.

Di sini dapatlah hendaknya kita maklum!

* * *

Berjamaah

Alwi bin Awang Tong, Ikhwan 2865 Kampung Ulu Sani, Raub Pahang, bertanya:

“Sekiranya imam batal sembahyangnya pada masa ia menjadi imam bagaimana maknum hendak mengganti tempat imam itu iaitu menjadi imam pula – adakah maknum mengikut batal atau tidak kerana imamnya sudah tiada?”

Jawab: untuk masalah ini supaya lebih panjang Bahasnya kami silakan tuan membaca buku pelajaran

sembahyang yang mengenai imam, makmum, masbuk dan seumpamanya karangan al-Ustadh Ahmad Sonhaji yang diterbitkan oleh Qalam, haraganya \$1.20 kulitnya berwarna merah dan biru. Di sana tuan akan dapat lagi mengenai perkara ini dalam pengertian Imam al-Shāfi'i.

* * *

Perkataan “Aku” dalam Lafaz Nikah

M. Syahid bin Haji Saleh, Sungai Tiang,

Bagan Dato' Perak, bertanya:

“Mengapakah perkataan ((aku)) dalam lafaz nikah digunakan pada hal perkataan itu adalah kasar? Dan jika perkataan itu diganti dengan lafaz ((saya)) dalam lafaz nikah adakah sah nikahnya atau tidak?”

Jawab: Perkataan aku dan saya adalah sama maknanya sebagai ganti nama kerana itu kedua-duanya sah dipakai. Kasar atau halus tidaklah menghalang untuk sah tidaknya sesuatu nikah.

* * *

Apakah Tujuannya?

Ahmad Sumun bin Yusuf, Bagan Dato' Perak,

bertanya:

Sedikit hari dahulu tersiar berita mengatakan bahawa Jemaah Menteri Revolusioner, terdiri dari Kernel Ahmad Husain Dahlan Jambik, Burhanuddin Harahap, Mohammad Natsir dan lain-lainnya berada di Singapura kerana hendak pergi ke Sulawesi. Betulkah mereka berada di Singapura? Jika tidak betul apakah tujuan berita itu disiarkan?

Jawab: Berita ketibaan mereka di Singapura telah menggemparkan sehingga menerbitkan beberapa pertanyaan, tetapi akhirnya polis dengan tegas menyatakan bahawa mereka tidak mengetahui akan adanya mereka di Singapura.

Untuk menyaksikan berita itu bohong semata

maka akhirnya dapatlah diketahui bahawa mereka yang dituduh lalu di Singapura hendak ke Sulawesi itu sekarang terus memimpin rakyat Indonesia terutamanya ummat Islam. Kernel Ahmad Husain ada di Kurinchi, Burhanuddin Harahap di Batusangkar, Dahlan Jambik dan Safaruddin di daerah Laring Gunung Berapi dan Mohammad Natsir di Maninjau.

Menurut pendapat kita bahawa ada maksud yang tertentu dari golongan musuh mereka (di pusat) menghebahkan berita itu untuk menjadikan sebab supaya pusat mendesak kerajaan Singapura berlaku keras terhadap pengikut-pengikut Republik Revolusioner. Cara membuat berita-berita memburukkan sesuatu pihak ini ialah cara Komunis untuk merubahkan lawannya – untuk membuat keributan-keributan supaya di dalam keributan itu dicari faedah-faedah yang bakal didapat oleh mereka.

((Permainan)) yang serupa ini sekarang telah dibawa mereka ke Semenanjung ini supaya ada terjadi keributan-keributan, dan dalam keributan-keributan itu mereka gunakan pula setengah-setengah mereka yang boleh digunakan untuk mendatangkan pertanyaan-pertanyaan di majlis-majlis kepada kerajaan supaya lawannya tidak bertapak – dan kebanyakan yang digunakan mereka boleh jadi daripada orang-orang yang sepengertian dengan mereka atau ((kawan-kawan)) mereka sendiri.

“Dan apakah sebabnya kamu tidak berperang pada Jalan Allah (kerana Allah), untuk melepaskan orang dhaif, lelaki, perempuan dan kanak-kanak yang terjerit-jerit berdoa: Wahai Tuhan kami! Keluarkanlah kami daripada negeri ini, yang zalim orang-orangnya” – (maksud Al-Quran surah Al-Nisā' ayat 75).
